



記言別集七六

丘墓

^ 16
2346
18



和
號 2346
卷 21-78



記言別集卷之二十

丘墓文

荷衣洪公墓碣銘



洪氏南陽大族其先出自唐事在唐城古事麗
時有禮史復簽書密直副使由道著於譜牒入
本朝有莊襄公師錫於公為六世祖三世有成
均司成 贈吏曹判書以平判書生僉知中樞
贈左贊成德演贊成生成均生負 贈領議政
仁祐世所稱耻齋先生者也先生娶順天金氏
前古相襄景公承靈之後而清道郡守希稷之

記

女也有子男二人長男進最貴謚端敏推恩
有三世封爵公為次男諱迪字太古別號養齋
又曰荷衣生六年先先生歿公幼孤而能自知
力學十八九既以才學發聞嘗讀書東湖湖堂
諸學士有酬唱作爭傳誦一時有先夫人喪與
伯氏廬於墓下朝夕饋奠必躬執供具以終三
年先先生有居業日記公慨然益自飭礪請教
於父友得動容貌斯遠暴慢正顏色斯近信出
辭氣斯遠鄙倍之戒終身誦之亦日記行事以
自省二十一宗家之嗣為後於從叔父平山都

護府使仁範府使司成公長男生負德濬之子
而中古賢公子朱溪君深源之外孫也明年成
進士遊嶺南見李先生於陶山聞為學之要李
先生嘆之曰善乎吾友不亡矣隆慶六年別試
丙科及第補承文權知俄薦史局仍選書堂甲
戌為弘文正字侍 經筵 上問天之所以為
天以及六合之外羣臣莫對公曰學貴平實窮
高極遠恐不可 上曰天道之微何以不講修
撰金字顯曰顯微一理然人事尤切為學在下
學上達其之言是也時伯氏方為著作公力辭

居西班一年復入玉堂轉著作博士丁丑陞副
修撰累遷禮曹兵曹佐郎兼知製教庚辰陞
禮曹正郎辛巳移兵曹以繡衣廉問畿甸拜修
撰陞校理癸未以正言復為修撰公前後在玉
堂十年公博於經學尤善於論思稱學士全才
時兩司論劾李珣用事專恣諸言事者皆得罪
玉堂上劄曰臺諫不言珣之偏私論其事為之
失言則過矣然因事論列無一毫私也 殿下
徒以珣敏捷多才謂可與興至治信乎知人則
哲帝亦難之矣 上怒玉堂盡斥去公出長淵

縣監有長淵城碣誌四年以疾謝歸戊子乃叙
為兵曹正郎己丑移校理再選書堂為都堂檢
詳尋陞舍人冬以執義復為舍人其十二月所
後母金夫人歿辛卯喪制未終而公歿七月十
二日年四十三 上以前日侍從特賜賻儀一
時士莫不咨嗟悼其無命其九月某日葬于道
峯山下回龍洞良向之原公天品穎悟既有家
庭遺教不墜早得向方又游君子之門行已有
禮立朝二十餘年當朋黨之際世道大壞公介
然特立不循俗說隨為士類所推重鄭汝立者

初以多學拔擢一時多趨之者而公曰此人詭誕因絕之及上變事作士禍大起而公不及焉公平生好賢樂善其學自事親敬長推至於忠君善俗用力於日用人事之則而恒言不先聖人之精微可見君子之學有方有序為詩有氣格亦奇麗可誦有荷衣詩什二百二十筆法慕鍾王晚好懷素書楊蓬萊稱其才當世罕比云公初娶唐津韓氏大司憲淑之孫別坐說之女無子後娶清州韓氏 贈領議政孝胤之女也聰明有孝友行通書史曉達禮義能先事審慎

不失錙銖公亦有事則必諮之敬重如良友夫人少於公一年公歿之年十月五日夫人歿祔葬同原生二男一女男汝翼汝亮婚姜弘勳汝翼敦寧府都正有婿三人縣監姜壽賢士人崔磚宗室陽寧君倣汝亮刑曹正郎有男二人有壽有阜有阜進士有壽生景濂生負有阜生景河景洛景洙景泗女適士人李麟徵又女一人未嫁姜弘勳漢城府庶尹生珮婚三人舍人柳頴進士李積監察崔毅量其銘曰
道如砥直如矢貞而確君子之履方而正君子

詩集卷之三
四
之止學有自是承是飭教有序是儀是式

洪教官墓表

君諱有阜字子厚荷衣洪學士之孫耻齋先生之曾孫也君少孤能讀書修行操守方正一時士皆重之二十六補國子進士上疏爭論學祭忤時議禁廢三十年至今 上世除 貞陵客奉改董蒙教官時君已六十一有母之喪哀毀逾制既三年才逾月而君歿年六十三知與不知皆惜其良善無祿君善事母能以顏色養志一以順適為心兄弟同居不畜私財皆至性其

歿也又以過感與喪俱盡自耻齋先生先學士皆持哀不勝喪而歿又有君亦可謂至行之世重為之嘆息識之君以孝立行行已與人莫不稱善孝為百行之源信矣

贈吏曹叅判朴公墓碣銘

穆少也拜司贍朴公於京師彰善坊館次公温雅有法使人起敬穆心悅之不忘未久公還嶺南歿後四十年穆從公之季子今殿中君璽嘗掌內侍學殿中君好古樂善則如其先人焉穆心自語善乎司贍公賢而教子弟如此哉一日

殿中君為其王父叅判公乞銘於穆仍示其墓誌而請并載其王母蔡夫人事云云其誌曰公資稟莊嚴操履堅確少遊陶山李先生之門卒師事趙月川先生其學教於家而行於人皆皆出於躬行心得之餘而嚴而有法樂而可愛穆益知司贍公家學蓋有自也司贍公當功賞之世再以原從推恩例贈公至吏曹叅判公諱薰字士秀朴氏本出自新羅高麗時有諱忠佐事肅王以儒學顯於公為九世祖曾大父諱紹宗贈吏曹叅議大父諱訥昌樂道察訪

贈兵曹叅判父諱從鱗奉直郎守吏曹正郎蔡夫人大司憲諱屹之孫成均生負諱承先之女夫人慈仁謹嚴叅判公治家教子弟實多內助云當兵革之後歲大饑鬻子相食夫人取養其宗族無依者數人以篤恩義親戚歸心享年九十六歿子孫滿前常戒之曰人非學其猶面墻爾曹勉之病革猶使之讀書忻然曰吾志願此也公先夫人四十年卒有三男三女長子守謙次守誼刑曹正郎次守謹司贍寺直長此吾所稱司贍公者也婚三人長士人金仲熊次權直

養次黃有永子孫甚盛以至曾玄孫百餘人銘
曰

蹈德秉仁而樹之淳不發於其身以昌其後人

司贍寺直長朴公墓碣陰記

公諱守謹字景靜姓朴氏醴泉人系出咸陽高麗名臣朴忠佐十世孫也曾大父訥昌樂道察訪大父從鱗吏曹正郎父堇 贈吏曹叅判母平康蔡氏大司憲忱之孫也公受學於趙月川先生簡靜少言操守有法 宣祖三十九年有大臣薦之初授 英陵叅奉慶主二年轉司饗

院奉事明年陞司贍寺直長又明年選司馬試其年有大獄公以小寺例補王府假官獄事急以捕囚不及時限罷大司憲崔有源多主文深以此重而亦以此疾後或上疏欲傾陷崔以媚朋黨者以公善楷書且謂公心恨崔不已欲寫其疏公却不寫反責其陷人不可其疏者乃止而崔聞其事心悔之以為公之賢能無宿憾於已也公少孤事母有至性稱善行教諸子日誦詩讀書不敢怠惰暇則習禮容樂觀書靜坐終日雖家人子弟不召不敢前也雅好山水嘗築

臺於蘇川因以自號而鄉人號公為鼎山洞主
四十七歿生於萬曆四年十二月廿七日歿於
天啓二年十一月十七日後月葬於同郡德巖
與淑人昇平金氏同塋初娶義城金氏自如道
察訪守一之女無子後娶昇平金氏 贈判決
事德男之女先公三年而歿年四十六有四男
三女男曰瑩曰璽曰璫曰璵璵前扶餘縣監婿
三人曰權尚達曰權佶曰李世美尚達成均生
負又有側室婿禹昌奎內外子孫三世至七十
餘人

李處士茂卿墓表

李茂卿諱晉茂初名晉高本宗室之世我 恭
定王第二王子孝寧大君補之後也大父景燦
司諫院獻納父悼以孝發聞旌表其閭者也茂
卿為後於族父盼盼父台壽義禁府都事茂卿
自少時樂從先生長者遊初見雪翁先生欣然
慕之遂為弟子終身事之方剛自守不肯循俗
媚世苟容平生好禮法慕古人直節以高尚居
漣川熊淵上無事閒暇漁釣性愛鶴養雙白鶴
三年春茂卿病胃入京求醫其九月茂卿客死

京中鶴既別主人飛去不返及茂卿歿而歸鶴
忽飛下殯門之外哀鳴良久不去客出涕曰鳥
有知其十二月葬縣南十里高子洞茂卿年七
十自號醉愚云娶南陽洪氏前古名臣忠貞公
應之後儒生順一之女也亦有婦人善行善於
舅姑嚴於祀事娠則居處必正飲食必謹曰女
節胎教不可不慎少茂卿一年先茂卿二十年
五十而歿葬於白嶽東麓茂卿歿而合葬於高
子有三男遠紀鼎紀漢紀皆讀書慎行稱善士
茂卿能教家導率之力也遠紀早歿有二婿

翹鄭觀周翹老人之次子也今為安峽縣監茂
卿有弟晉元與之同爨而居晉元不幸短折而
無子有寡妻稚女茂卿視其衣食撫育一如其
弟時以鼎紀為後銘曰

善之無不喜過之無不規奄忽長逝而不見令
我茫然而心悲

戶曹李判書墓碑銘

判戶曹李公諱演字子淵本宗室我太宗別
子孝寧大君補生寶城君容寶城君生栗元君
宗栗元君生呂陽君子謙呂陽君生龍岡縣令

對縣令生吏曹判書樑 仁順王后之舅也判
書生 贈領議政廷賓於公為皇考妣西原韓
氏左議政清川府院君伯倫之玄孫也追封貞
敬夫人夫人大家之世甚嚴家庭之內無曲恩
小惠公魁顏豐下沉毅多智寡言笑萬曆中東
方大亂天下兵皆集王城有行伍卒善相人者
見公曰貴人後日作度支事尤有難於此者矣
二十二補國子進士三十七擢大科以承文叅
外移春坊說書陞正言連在三司選知製教
光海初以御史出灣上李爾瞻尹龍灣遇之甚

善公私謂曰他日誤國者必此人瞻聞之深恨
之及為天官郎瞻為小宰薦引鄭造者為持平
公執不可瞻怒公遂不仕光海五年永昌獄起
實用事者陰主之人莫敢言其寃公為推鞠問
事因欲發咀呪事事連 太妃公叱曰天威嚴
重囚安敢亂言囚畏伏莫敢恣其所指者聞者
多之李相國德馨言王子貸死事三司論以按
法公方為應教正色曰大臣不可殺羣議譁然
怒之公即起去 先王末命托保護冲子者有
七臣鄭仁弘容姜翼文者為正言人皆曰七臣

當死翼文子大遂頗善公為言七臣無罪事以故其事遂沮及永昌以幼稚見殺鄭公蘊上疏極諫得罪公與鄭公素善論者以為其疏出於公當竄卒削職歸田里後因辭引公以子敏發以公扶護太妃為言父子就理卒無據得釋十年叙為舒川郡守二年陞通政尋謝歸明年以同副承旨出為黃延道觀察使功臣李貴為平山屏左右言舉義事公終不答及舉事遺之一劔而已彼心悅之私語曰此大事義之所在有從者亦有不從者謀議已成不苟從亦義也

仁祖既即位有廢人掘地事守將得衣帶中書書黃延方伯金吾召問公李公貴白上言某大義正仍極言立節昏朝狀上雅信之不問釋之秋特拜湖南觀察使賜弓矢以命之明年李适叛上南狩公陳兵迎上於公州上見兵精行陣嚴肅稱善特加嘉善仍駐駕公州公請分軍衛上自將一軍以伐賊軍門塗曰城粗完大眾不可去也适既戰敗死車駕還京公以輜重兩餘布數千穀輸度支以需用至天安白上曰臣為湖省日久請從上上

言別錄卷之三十一
十一
曰非卿無以鎮之仍留一年令承旨布諭南軍
俾知公竭忠報上三年奴陷兩西 上幸江都
以公為京畿觀察使特加嘉義奴既退又北邊
有警改北道觀察使修器械治軍旅有壯砲別
隊始此七年為嶺南觀察使上館倭積弊請以
四賦供委積罷戰卒供輸之事 上從之十一
全以警又拜北道觀察使以疾歸十二年三年
間參判戶兵刑三曹十四年奴大人寇三日前
騎已逼王城 上急入南漢以公復拜京畿觀
察使公白 上曰臣嘗廉察南北諸路撫循士

卒請緹城出聚兵待南北兵皆會據險阻以為
聲勢羣議不定卒不行 上還京陞資憲拜戶
曹判書謝不出亂後北路殘破大臣白 上以
公遺惠在民等復拜觀察使以疾辭明年為刑
曹判書復移戶曹平物價貴出賤入數年之間
府庫充溢露積於外既與清人約成其侵責我
者日多金帛百貨輸灌於彼者不可計數而嘗
歲飢民急不責於民者常多歲幣粒米至萬包
公以計減十九蠲三南赴北軍布三萬五千
上稱善曰度支得人民受其惠乃至此也於是

已言別錄卷之三十一
十一

禁防納定物貨分等以防奸盜別藏金銀貨布
累萬白 上曰急則國家賴此不細 上亦勿
輕用也十八年公已七十一以老辭 上不許
然問其老令僚佐就私第議事特加正憲二十
三年連上疏乞免移刑曹判書尋還拜戶曹力
辭不許不得已出視事為持平李墳所沮毀公
上疏請罪乞免或曰墳久不快於公積憾而乘
之 上不直墳公去而墳亦坎軻他日 上對
羣臣言某為戶曹能不言而財足此人才大而
恨不大用也領議政堊曰某當官盡職實為國

無他也 上亦言其盡瘁元斗杓代之初不甚
相悅及見曹中事嘆曰信乎人固未易知其規
模施設多人之所不及者守而勿失毋徒紛更
之為也公因風痺不利連拜京地樞府籌司皆
不出 上特授典醫提調以便醫藥每臨羣臣
輒問疾差劇或使太醫視之二十六年六月公
卒年七十九 上不視朝二日賜吊賻如儀其
九月葬于長湍板浮里已向之原前後二夫人
宋氏梁氏之葬同原公平生與贊成公同產業
一如父母時自骨肉親愛以至貧交疏遠恩義

敦厚當事必先立其大者不顧細故尤長於治財幣能相時量勢不喜不怒七年之間國富民悅掌食貨者 宣仁以來稱一人而已如臨民按節之邦皆有追思碑及卒自生徒吏胥以至賈人徒隸皆來哭失聲曰吾儕小人受公之德惠何可忘也外而所臨諸道將校軍吏士各出賻以為禮葬時都民哭送者以千百計返哭亦如之其銘曰
威而能寬確而能安以剛行義景也大慮惠民定也

宋夫人行副護軍栴壽之女生二男二女主簿敏開府尹敏樹敏樹為伯父贊成冲之後二婚叅議沈膺士人金震杜梁夫人部將思洪之女贊成崔滉之外孫也生三男一女男水軍節度使敏發郡守敏華僉正敏白敏白為完豐府院君曙之後婚牧使閔晉亮又有側室子一男四女男監牧敏應婚僉使具仁聖僉使李時衡金光料崔繼著敏開生二男一女男周登第未仕而歿次進士召婚監後尹端敏樹再娶而生三男三女男郟郟郟進士郟生負婚縣令沈轍

士人鄭重遠洪聖叙轍前妻婚也重遠妻有節婦旋間敏華生一男一女男若婚士人南壽全敏白生四男三女男咸磐者啓咸護軍考生負婚僉正鄭載岱郡守趙渭叟士人柳世顏沈膺生二男一女男院正玖直長琬婚縣監申在敏應生二男及第裕一人幼李時衡生二男一女男及第慎及第恂婚閔璟金光焯生一女婚李時顯崔繼蕃生一男七女男幼女嫁者三人餘幼婚進士李隨沈若津鄭度明內外子孫至三世四世百有餘人

魯淵沈公墓碣銘

公諱光誅字希聖姓沈氏國初名公青城伯德符之九世孫也青城伯六世有京畿觀察使銓觀察使生進士友俊進士生懿憲公詔為後於仲父青溪府院君友勝於公為皇考妣永嘉權氏兵曹判書徵之女也公篤信嗜學自為兒時知讀書脩行稍長成尤致力於經術光海時懿憲公連大獄竄絕域自江界遷東海之野城三千里公十六辛苦遠途時李公命俊亦連坐流海上公從而受易傳啓蒙及十年光海廢懿憲

公復顯用越五年公選司馬兩試卒未功臣李
貴崔鳴吉主 元廟追尊之議公與太學四館
諸生上疏言非禮之禮曰昔漢宣帝追尊悼園
稱皇考立寢廟程子曰亂倫失禮以孫繼祖不
遠引三代於此可見也稱皇考猶且非之况列
之太廟乎哀安桓靈昏悖妄作不知所以尊親
者反陷於不孝不義云乙亥為大君師傅 孝
廟潛邸時也問瞿佑新話句解公對曰為學之
要在講明義理養成德性淫誕不經之書盡人
志慮不宜留聰明於此書也丙子有南漢之事

公從 上於圍城之中賊勢既張必要 王世
子為質公請對言 世子不可出之義因進戰
守之策曰斬主和者以徇城中 上既出城公
入壽春從丘壑之樂名其室曰拙樂自號魯淵
累除官皆不出丁亥擢拜司憲持平戊子又拜
持平皆上疏辭謝己丑 孝宗即位又以持平
改春坊進善上勸戒數千言庚寅拜掌令上疏
辭以出處之義 上不許時 大行之喪既練
禮官定行公主吉禮公上疏論大喪婚姻之節
曰朱文公議小祥後許朝請大夫以下大祥後

許中大夫以下太中大夫以上皆禫後行之公
主之貴且近豈特大夫之比哉請待三年之後
以示 殿下家法之正又有成渾李珥從祀文
廟之疏爭論不已嶺南有偽 批事覺者自殺
而其知情者下本道按問執義趙珩等論以大
遂請鞫于 王府事將蔓大公力論治獄之體
又治以大遂不可珩等適職既大拂時議而其
事得已辛卯大旱公應 旨進抑戒衍義壬辰
又拜掌令上治道八條明體用興學校嚴內外
崇禮讓好聞過去虛名推實惠設形制凡累千

言甲午為尚衣院正尋移司僕寺正夏大水
上自責求言上疏極言災異闕失 上曰格言
令人起敬十二月懿憲公卒公居喪作家禮補
解未及大祥貞敬夫人卒公連有喪已六十
上令政院問之賜藥物既三年又拜司僕寺正
俄改掌令 上有銜櫛之憂公上疏言警戒仍
陳政弊 上皆從之尋特拜承旨力辭不許已
亥三月大雪應 旨陳體信達順之道五月
孝宗登遐 顯宗卽位十一月 上始開 經
筵政院以公 先王所專用請侍 經筵上疏

辭之明年拜工曹參議又上疏乞免仍陳聖學
持敬之要宋時烈宋浚吉以 孝宗承大統非
長子 大王大妃當服期年之制有爭論大起
公亦草疏論其失禮家有喪未及上因收議言
宗統之重因力辭遶工曹後連為承旨皆不出
閉門郊居三年而卒公生於萬曆戊戌五月十
八日卒於還甲後五年五月廿一日其九月十
二日葬于廣州治東三十里退村先兆之次南
向之原今 上元年筵臣白 上以甘盤舊
恩贈吏曹參判青安君公聰明博學修已有方

必先行而後言平生不喜近名之行過情之譽
忠信謹飭篤於親親謹於喪祭用力不出於日
用彛倫之則一以古人自勉見世亂屏迹自守
及 孝宗卽位眷待甚厚義不可決去能敢言
正諫可謂古之遺直公已老而世道益難卷而
懷之不復用於世也其廉介之操獨行之節無
愧於古人其學自居家孝友推至於格君正俗
清而不激和而有守可謂處濁世而不亂者也
貞夫人權氏籍福州嘉山郡守慶男之孫四山
監役復吉之女儒城君柳熙緒之外孫也夫人

賢於婦德一門稱之善於祭祀賓客之禮甚得
舅姑懽心公歿後十四年正月二十八日七十
三歿祔葬同原夫人常戒子孫曰我逮事祖母
今子孫至五世六世視祖先則皆出一祖不可
以踈遠有所厚薄也子孫世守之以為家訓云
無子取兄弟之子栢為後栢 顯宗三年以
謁聖壯元官止兵曹佐郎婚別檢李震奎栢生
得震得泰婿丁載重震奎生彭齡龜齡龍齡鶴
齡麒齡翼齡銘曰
忠實之學篤愛之仁可以事君可以事親知微

知幾守道不貳以潔其身

完興君李公墓碣銘

公諱幼澄字澄源系出宗室曾祖 贈喜安君
輯祖 贈錦川君城父戶曹判書 贈領議政
誠中母貞敬夫人趙氏籍平壤儀賓府經歷琇
之女嘉靖四十一年十月乙亥公生夙成自為
兒時能讀書飭勵比長卓然有立篤於孝友敦
厚周惠嘗遇飢歲當食不飽一以愛物為心一
時名士大夫多推許其賢萬曆十一年我 昭
敬十六年以丙科選承文院明年薦翰林十六

年春以賀至質正還自京師陞司畜轉兵曹佐
郎知製教後年改正言十九年春由持平遷
修撰夏賜暇書堂尋移吏曹佐郎二十年三
月以校理有巡撫北邊之命時有倭寇上
將幸西京公改體相崔興源從事先行海右及
申砭兵敗擾亂車駕卽出公馳歸謁上於
沙峴遂從上西行五月為兵曹正郎轉應教
兼經筵侍講編修官尋改司諫上旣幸平
壤百官不備公常侍左右當急遽能兼攝數事
上知其賢每議事必曰非李司諫不可常不名

乃賊進薄平壤車駕當出西民亂擁駕大
譁計不知所出公曰任方丙者當受其罪卽數
之軍門誅其首亂者數人然後車駕廼出
上臨亂旣以光海君為世子道中分百官衛卒
令鎮撫軍國戎卒數千人公前年為騎省郎嘗
一點兵卽口誦兵籍立分部伍追考本籍一人
不亂世子遂向江東上旣住龍灣日夜求
救於遼廣衙門得發兵明年正月克復平壤李
公恒福實主此事而計策亦多出於公李公常
以國器許之當亂初公與母夫人訣戒其諸弟

曰西幸已急先 駕而圖生非忠也後 駕而
徒死非孝也既奔竄不相知至此上疏陳情乞
死生相訪 上不許曰忠孝不得兩全及諸弟
幼滑勿深勿沉以毋夫人從間路至龍灣 上
聞之甚寵賜之人以為忠孝全門二月 上
駐永柔時經略來屯關上無復進討計又不許
車駕東歸鬱鬱不快適有御史巡行東邊公往
勞之因謂曰小邦賴天子神靈社稷不亡寡君
日夜思還舊都弔死問孤無他願也經略軍威
嚴重不敢擅過慷慨言之御史許諾曰歸當以

狀奏之勉之毋失機會嘆息曰諸大夫皆賢何
患不濟於是 上以龍灣事悉委之於公矣三
月以公拜義州牧兵馬節制使時衙門將士大
集日誅責萬端公處之無難凡事之係利害者
一從便宜大得民漢心雖驕將悍卒莫不相戒
慎勿犯賢節制云公與父老立約束令民口三
丁以上復二人安業民大悅 上方倚公為重
公盡瘁成疾其五月晦日卒年三十二訃聞
上歎之曰久為一二臣所誤不得左右予躬天
奪良佐終始恤其家公久為諫院多直言論劾

欲中傷者乘時力擠令不容於朝故 上嘆惜
之如此事平行賞羣臣追 賜公忠勤貞亮效
節協策扈 聖功臣爵至吏曹判書封完興君
初葬於坡平山下李氏世葬其葬有水改葬臨
津西崇禎九年以其地封 長陵故還葬坡平
之金谷貞夫人趙氏籍揚州藝文館檢閱擴之
女嚴而有禮宗族歸心夫人少於公二歲而公
歿後五十一年甲申七月廿七日歿為八十一
歲長男命隆早歿次男命雄事 仁考為嶺南
觀察使司宰監僉正成櫟高城郡守朴遠基為

二婿而嫡孫男女四人男震奎水庫別檢婿三
人縣令宋孺悌判書陸來善應教趙威鳳又有
庶出男女六人男震謙震及皆早死三女為鄭
基朴秀阜慎碩恒妻一女為兵馬節度使鄭后
亮妾外孫朴遠基生四男一女男昌胤興胤良
胤亨胤婿士人趙絳成櫟無子今為後者漢城
府判官熙胄也銘曰
功不食勞賢不受祜天胡嗇其壽也銘功彛鼎
以顯其忠為百代教首也

李觀察碑銘

公諱命雄字挺而姓李氏系出宗室我 莊憲
王玄孫錦川君瑛生 贈議政誠中議政生完
興君幼澄完興君夫人揚州趙氏藝文館檢閱
擴之女萬曆十八年十月癸酉生公生四歲完
興君卒趙夫人賢教之如嚴父公剛毅有大節
好博觀諸家曰士讀書而不能通古今之宜明
當世之務者雖多亦奚以為公既少孤事母甚善
事諸父如事父萬曆末廢主既殺永昌閉 太
妃於西宮公歎曰人之道絕矣嘗舉進士不第
耕田以養親及 仁考反正之四年初仕為東

宮洗馬陞侍直其九月 庭試選乙科第一人
明年為正言又明年為便養乞補外為固城縣
令三年入為修撰知製 教經筵檢討官以固
城治理 上賜表裏下書廢之九年有巡按關
西之 命於是朝廷有棄清北之議故有是命
時檄島軍食乏日求通貨於我而朝廷不許將
朝夕有變公至以便宜發傍邑數千斛穀以賑
之既還啓陳民情勢及塞上積儲治兵之策
棄地之議遂止明年 章廟追尊之議起公以
獻納復入玉堂以爭論忤 上旨黜一年復召

為修撰夏以獻納遷吏曹佐郎冬陞正郎十二年春復以獻納乞養為茂長縣監十四年又為持平司諫趙綱論大臣之貪污下理時論畏忌莫肯為上言者公獨力爭又繼而有論列者上悟而釋之時金人初僭位號要我和好朝廷將遣使報之諫官多爭之者公為執義亦爭之曰中國義不可負也今媾者皆以為虜強我弱不如緩禍徐為後圖此言固近矣虜小醜何強西北雜胡亦未盡服虜許我以兄弟舊好尚且羞辱不然一朝以無禮加我為今之計者不

知更為何策也既不早圖狃於姑息終至於國不為國彼媾者萬死不足以贖其罪也冬虜大舉入寇三日前鋒已薄國都急上馳入南漢公啓上曰急輸城下積粟為戰守計朝廷方主和事不行虜圍城相守和議益張城中無鬪志公請誅主和者以激礪將士心上以其人初有緩敵之功不從賊日耀兵城下而無一交鋒鬪士益怠公謂體相從事蔡裕後曰今賊遠來疲勞不因此時決戰賊來益多食盡力屈不亡何待君盍以此白相君乎裕後深然之即從

其計畫購募死士戰小利城中始有戰守議及江都敗和議遂決當出介和者諸諫官以與虜皆畏怯莫肯自首而事迫於世子公慷慨請自往二月世子以行公以輔德從至高陽乏食公請於世子先從官一人前行以資行食難其人世子顧謂曰非君莫可當賊路邑里空虛公能出入山谷告諭吏民至遼界累千里行李不乏上亦有旨以行中事專屬於公矣既久在虜中每因事進戒世子亦虛心納之至事有甚難者多所彌縫世子愈益重之夏

賞從上勞公陞禮曹叅議冬歸有飛語上怒官官在虜中縱酒多不謹先還者皆已杖流而公亦逮繫驗無實罷出明年夏乃叙為工曹叅議初有奉使者被拘久不歸至則世子臨行上謁諸從官皆曰彼習於虜者也請與俱往公私謂弼善閔應協曰君亦此言者耶後必悔公能竭力深念與人必忠驅馳於患難之際災害不及焉秋改承旨兼經筵叅贊官時大饑公白上廣出告身募富人粟以賑之冬上命立溫祚祠於南漢功臣李曙以築城功多令

配食同室公曰曙於溫王雖異代之君臣嚮之
同室則非禮也 上從之明年春以大司諫移
副提學上疏辭之尋出為嶺南觀察使又以母
老乞辭 上不許賜弓矢以獎之初安東士人
有金是樞者上疏言山城事禦留城在嶺南境
上最據險云及公出嶺南 上以此屬之公至
界卽以形勢具聞大臣請令審擇地利以為南
方保障公行見諸名城關防要害皆莫如架山
其九月大發軍伍徭戶遊丁凡十餘萬人至明
年四月城既完請割傍數郡之地設邑欲移營

鎮之朝廷不許而只割星州一縣置恭谷都護
府時列邑解弛紊亂無紀公一切繩之雖舊交
大官無所假借其不從令甚者黜之以故不悅
者衆及於大臣以為築城事重請毋代而嫉之
者以役民多怨論劾公亦上疏引咎自劾七月
復入政院前日因慶大赦徒流以下以輕宥羅
萬甲事未謝而罷公嘗議均田大同二法與大
臣論難於 上前上善之公請以大同法先行
於嶺南公去而竟不行其十二月復為禮曹叅
議以母老上疏乞郡明年春為洪州一年邑大

治自喪亂來恨當時事已無可為而嘗語人曰
我世臣也不可去也既在其職當盡其職鍊戎
卒治器械未嘗一日忘北首也二十年正月廿
六日卒於官年五十三訃聞 上曰盡瘁王事
死於官守對羣臣嗟嘆言之其三月歸葬坡平
公堅嚴見事明能善謀而善成好規人之失而
未嘗對人言其過雖在朋黨睽乖之世無一異
陰陽而左右之賢愚皆得其誠心偏裨將校之
屬皆量才而使之各盡其能及卒遠近來哭者
如悲親戚二十一年嶺南觀察使林壇周覽營

壘嘆其奇才而反被讒詬具上築城疇畫形勝
請追行爵賞 上嘉之 贈公吏曹判書封完
陽君貞夫人柳氏籍全州父清道郡守諱穉以
直道著聞夫人亦以婦德一門稱賢後公二十
三年七十三而卒甲辰十二月廿七日也合葬
坡平生三女一男婿三人縣令宋孺悌判書睦
來善應教趙威鳳男曰震奎水庫別檢又有側
室子男女六人男曰震謙震及婿三人鄭基朴
秀阜慎碩恒一女為兵使鄭后亮妾孫震奎有
子六人彭齡龜齡龍齡鶴齡鴻齡翼齡外孫宋

孺悌三女其婿權觀睦天和沈義圖二男世載
世憲趙威鳳一女婿李允迪銘曰
兼而能讓人之望也威而能恕人之譽也

李別檢墓表

君諱震奎字文休姓李氏我世宗七世孫而
完興君幼澄之孫完陽君命雄之子也母全州
柳氏清道郡守禧之女也明顯皇帝萬曆四
十七年十二月戊寅君生祖母趙夫人甚愛育
之常飲食得一佳味必先於君及君始有知不
先父母不食趙夫人益竒之莫之違也號曰孝

兒崇禎四年完陽君乞郡為固城及召還君
年始十二能幹行事完陽君喜曰自此吾有兒
既就學文藝日將沈承旨光洙愛其為人以女
妻之壬午完陽君卒於洪州君持喪有禮人皆
曰善居喪家貧事母能色養堂叔父命著稱之
曰孝子之愉色事死如事生吾於此人見之矣
君平生口不言人是非不喜交結為名自守以
篤其行師事觀雪先生先生歿為之服師之服
已亥以行誼除靖陵叅奉甲辰又除水庫別
檢其年柳夫人患風痺病君晝夜不離側數月

柳夫人歿自完陽君歿繼而趙夫人歿君持喪六年毀感因多病又柳夫人歿既殯君死乙巳正月廿四日年四十七吾聞天道福善禍淫君行出乎古人無祿而不見何也所謂天之道信耶非耶孺人沈氏事舅姑有至性一順君意一門稱賢先五年四十一歿卜地不吉寓葬牛嶺今合葬之墓在坡平完陽君墓下有六男彭齡龜齡龍齡鶴齡鴻齡翼齡彭齡早歿銘曰嗚呼以君之多才多藝沒而著而諸子之隸隸天之將厚報於其世耶

木翁宋先生墓碣銘

先生諱瑄字冲懷姓宋氏本礪良人高麗僉議中贊松禮之後也中贊九世有掌令好義顯於我中宗世為聞人掌令生修義副尉檜副尉生百祥於先生為曾大父大父三世母金氏籍安東正言鉞之女也先生少受業於順川都正既篤信修行後遊楊庵幸村之門博聞君子之學我宣祖九年初仕為繕工監後六年選用庶謹吏先生擢拜司饗主簿明年為果川縣監十八年為抱川縣監田政不治豪右無并序風

小民苦之先生一繩之以法右族多不悅治縣
三月罷百姓立遺愛碑後年為江陰縣監一年
為司憲監察二十一年為雲峯縣監明年有大
獄所謂已丑獄者也及兩李連死人心大懼莫
敢有相顧之者而先生躬視殮一不以禍故相
負也卒以與罪人親善得罪罷二十六年為唐
津縣監當兵革之後飢饉仍之先生躬自薄以
給民所全活甚多百姓稱之曰後世必有天道
之報及謝去歸多流涕思之二十九年拜翊衛改
戶曹佐郎一年以典牲主簿改刑曹陞正郎尋

拜載寧郡守三十六年為軍器僉正後以軍資
僉正為谷山郡守二年復為翊衛時先生已六
十三憲令世子出則翊衛執寶光海為世子素
聞其賢心敬之每出必使小宦執寶出宮門之
外明年為丹陽郡守光海五年為利川都護府
使辭以老不入都門十年卜居開天從山水之
樂其溪上亭曰養志之亭日閑暇自娛別號曰
木翁 仁祖反正之年以大年有白 上者加
通政後五年避亂於清風寓居水村七年而歿
先生生於嘉靖二十三年五月六日歿於崇禎

二年四月一日春秋八十六後月歸葬揚州妙
寂山下族葬之次先生天資篤厚行誼方嚴其
問學之正踐履之常皆可以矜式後人先生二
十一先府君歿五十八先夫人歿既葬皆守墓
三年然後返忌日必黻巾素服悲慕不衰以為
終身之喪檢身有法制行有禮既篤於孝悌以
親親為本推及九族教子孫必有義方一門之
內忠愛無間至於僕隸下賤亦必推恕而主恩
與人交恭敬信讓見善而喜若已有之聞過而
規若耻之在己也歷仕三朝為郡縣八守法廉

平無一循俗苟私以故未嘗久於官也所與友
者如韓久庵百謙洪晚全可臣權寺正用中洪
叅判履祥德信公子金翠屏昌一康竹礪復誠
禹東溪伏龍許留守潛或以道學或以賢能皆
時之間人初與晚全公共師事幸村先生以古
人之學相推許云夫人李氏籍載寧別提衡之
女克順婦道先生十年七十八歿葬在同原
有一男三女男時保陰城縣監婿三人別提丁
彥璿縣監金怡觀察丁好善孫時保五男一女
男孺孝孺悌孺信孺敬孺微孺悌縣令婿直長

姜聖期外孫丁彥璿二男一女男時高時說婿
李惟清丁好善二男二女男弼善彥璿獻納彥
璧二婿承旨安獻徵判書吳挺一子孫至三世
四世百餘人先生於書老而益勤論著古人之
奧尤致力於禮學後家失火書皆不傳銘曰
安而利出處有義確而貞守道不貳嗚呼敦且
淳儀式後人

壺山君宋公墓碑

仁祖功臣壺山君宋公諱時范字希文其先本
礪良人曾祖 贈左通禮檢祖 贈左承旨延

福父 贈礪興君珽母 贈貞夫人李氏籍全

州判官元常之女宋氏三世封贈皆以公貴也
皇明萬曆七年我 昭敬十二年十一月七日
公生生八歲受孝經大學又能書客有求書者
特大書孝梯忠信客試之曰兒無他學長則以
此四字應主司乎曰豈特應主司而已事君澤
物皆此四者客嘆奇之性聰明善記誦志落落
不屑屑為名嘗為親應舉累選公車及父歿仍
不應舉力作以供母膂力絕人以選初授宣傳
官心不肯曰讀書不成名執戟侍陞楯可羞時

北邊多事選才勇李相國恒福薦於上上特
賜弓矢孫吳兵法以獎之戊申登武科未得仕
母歿既三年復為宣傳官仍選籌司郎方光海
政亂即棄歸太后廢時諸爭臣皆得罪公上
疏極言為中書官所沮去後有大臣知其賢選
以不次累官至訓練院副正終不就仁祖潛
邸時遇公權與語如平生大喜得人以書托李
曙曰斯人者智勇過人可與任屬大事曙素善
公自此愈益重之及癸亥舉大義公將甲卒功
力居多上特進階為別將令直禁中上既

與奴絕和親選邊守公為郭山郡守上送之
曰勉為之尋移雲山郡守特加嘉善寵用之時
副元帥适已陰有叛謀上遣繡衣使者行邊
邑有賜書公受書即以單騎至适軍留宿不
見适而返人莫知何事也至熙川暴卒十一月
十八日年四十五訃聞上大驚悼遣禮官賜
之祭特令省司送其喪明年正月适舉兵叛
喪至金郊驛适大掠而過其二月以禮葬揚州
之妙寂山下先妣之次四月追賜奮忠贊謨
靖社功臣號爵兵曹判書封壺山君妻崔氏

為貞夫人公無子 上命立後母令絕祀也八月又特祭之仍厚賜恤其家公早失父母有姊妹四人皆寡居無所依公均其減獲必薄取而厚奉給性敦厚慎重一不以侮慢加人能恤人之急如嗜欲慕義無窮崔夫人籍海州禮賓叅奉駟之女也有至性公歿哀毀自苦不食蓋嘗哭之如初喪三年八十四歿 孝宗九年正月廿六日也三月祔葬同原所後子孺敬於公為族昆弟之子而故利川都護府使瑄之孫亦名人之世也生二男二女男世甲世貞長女適宗室瀛昌君沉其次未嫁銘曰
力如虎勇如羆持下執雌大邦之桀知遇 聖哲戡難克懲戎臣之烈勒功藝鼎垂耀百代名不可蔑

慈山先生墓碣

先生姓鄭氏諱彥嘗字容父本百濟之湯井人少博讀書為文章名於 明宣之際其文贍而輿肆而聳牙抑揚長於諷本之屈原參之子雲相如韓柳氏而成一家松川梁應昂稱之曰千古絕才後千載無此作車太常天輅註萬人

坑人爭讀之膾炙於時萬曆中國子試獻玉貌
篇擢為壯元號為鄭玉貌云於是其名滿一世
性高抗無媚世氣忤權貴人陷危危必致之死
而從獄中上書自辨縱得釋猶排擯之不已坎
壟不得意沒於窮途命也終其身窮抑無聊不
改所守節操愈堅教授生徒號為慈山先生屈
原怨而思子雲相如媵而媚班固艱退之平子
厚苦蓋楚古漢麗唐變古而為排者也先生集
諸家為騷學三體行於世先生生於明嘉靖二
十四年沒於萬曆四十年年七十八先生無子

穆二三十時與鄭希聖奉璧同學於先生穆學
戴記擅弓古經二子皆學文章者也今先生沒
將六十甲子當時從遊士皆亡穆以八十在世
洵吉辰既修墓立碣墓前者前坡州牧使鄭東
高儒生奉千秋寶奉鄭氏二家子弟也并識之

朴松堂先生碣銘

丁巳

先生姓朴氏其先本密陽人松堂別號也曾祖
左贊成好問祖安東大都護府使哲孫父吏曹
叅判壽宗母貞夫人李氏我 恭定王之孫也
父讓寧大君初立為世子我 莊憲王在諸王

子有聖德乃佯狂以讓之國人擬之太伯虞仲者也憲宗成化七年辛卯先生自為兒時偉然異凡兒父叅判公命名曰英字曰子實生五年叅判公卒七年母貞夫人卒十年母淑夫人卒未卒喪祖父安東公又卒先生十二持重喪居廬既三年習騎射十六七已勇力聞二十一從元帥李克均虔州之役其明年壬子以武選居列士三年甲寅我 康靖王薨嗣立君是為廢王先生知政亂即去歸鄉里居洛水之上與當世名儒鄭鵬朴耕交遊為師友從鄭氏講

大學經傳學既通遠近皆師之我 恭僖王四年除宣傳官不仕明年庚午三浦倭叛大發兵討之公特拜助防將出昌原既事平仍不復仕居三年拜黃礪縣監三年政成擢拜江界都護府使又三年以治理移義州牧使未赴召拜同副承旨轉至左承旨己卯陞拜兵曹叅判時趙光祖等以經術進陳治道皆三代古事一時士多趨之者而小人多疾之先生心憂之即謝病歸其夏賀聖節朝京師冬復命光祖等皆被罪而光祖竟賜死先生降資在西樞仍為金海都

護府使一年於是良善皆斥先生亦削職還鄉
其冬有誣告事以為與東都尹柳仁淑謀去用
事者召問王府論死先生慷慨爭下極言無事
狀其誣告者反坐而先生得釋居洛上十六年
杜門不出專事修學學者稱之曰松堂先生及
用事者敗 上復召用良善先生為嶺南左節
度使三年庚子先生卒年七十葬于同府二十
里官洞初鄭鵬朴耕來見先生鄭氏指冷山問
曰山外何物先生不荅後復問子知山外何物
乎先生曰山外亦前山鄭氏忻然喜之先生嘗

著晦庵白鹿洞規雖五教學序修身處事接物
五篇自人倫之本推之於道之一貫以極為邦
之術三代損益其文二十四貞夫人李氏都承
旨世佳之女生居易國子上舍居易生敦復敦
仁敦復生負敦仁與姓署叅奉婿二人士人金
昌鳳進士南守正敦仁孫敬社官至左尹又有
外孫李汝發為諸道節度使入為御營大將封
韓興君皆以廉直稱先生二十六始發憤讀書
既積學而通以自得為宗傍通素問難經善治
四方風土奇恠疾至今南方之醫傳誦色相之

變善州自古稱多豪傑之士金樹吉再金淑滋
金宗直李孟專鄭鵬河緯地七人及先生金鰲
有先生遺祠黃碯縣亦立祠以祀之其銘曰
哲人其巍君子之表高蹈卓立離世俗之擾擾
遊無窮入奧妙貫天人之教

許相國碑陰記

戊午

公諱頊字公慎本陽川人 世祖名臣忠貞公
琮四世孫也沉厚寡言臨事慎重自初出身久
居館職不甚知名累為郡邑以治行稱辛卯為
公州牧使仍陞湖西觀察使當壬辰大亂兩湖

幸被兵最後行朝隔遠賊塞路公能治兵阻阨
以為聲勢通漕運給軍餉不絕致力居多師旅
之餘國大飢人相殺食公受命入中國請賑得
山東粟二萬二千七百以賑東民丙申復出為
江界都護府使得吏民心監司上治績曰廉以
行已寬以臨民府在古靺鞨南為賊路之衝
上特移授義州府尹仍擢拜關西觀察使及叅
上召拜兵曹叅判時日本倭媾和會群臣合議
公曰此不可上聞於大國壬辰大國許和而我
以不從故也尋陞漢城府判尹改戶曹判書丙

言言老集卷之三十一
午以吏曹判書拜右相陞左相胡酋奴兒哈赤
擊破忽剌溫北邊騷動以公為兵馬都體察使
以備胡戊申 上登遐三司告臨海君肆謀叛
時鄭仁弘上疏罪狀領相柳永慶領相謝病不
敢出公奉世子即日登大位於行宮永慶安置
慶興公謝病乞免三司論項以三公黨惡亂政
廢主曰左相重厚謹慎豈有此事三司連啓罷
相乃止初 上疾彌留領相將行禱於山川公
曰有 王世子在大臣不可主此事以故柳氏
敗而公得免於禍公出居西湖有掌令李頤言

項通賓客妄論朝政人心大懼不敢相問公居
西湖十年自同村翁野老言不及時事自號負
暄有申景禧者誣告大獄公辭連付處原州卒
年七十歸葬禹勤後六年 仁祖克大難光海
廢而大釋諸囚公追復官爵公至孝居父母喪
啜粥哭居廬三年有季父馮年八十一以事父
者事之又推仁於宗族交友莫不曰賢平生以
謙慎廉謹四者自勉自居家以至立朝事君皆
以此四者其教蓋質信無誇可謂不言而躬行
者也

李正郎墓誌銘

公諱幼清字清源係出國族高祖江陽君瀟我
莊憲大王之親孫以桂陽君增之中子為叔父
潭陽君琛之後者也曾祖喜安君輯祖錦川君
瑊好學篤行有賢者之德與高士李仲虎張倫
齊名為友父誠中 宣祖世為戶曹判書以長
子幼澄有功封賞追爵領議政封完昌府院君
母平壤趙氏儀賓經歷琇之女公為人寬而能
嚴見之儼然有長者軌度平生不為苟難以為
名嘗累舉不中以門地初仕為造紙署別提時

上幸龍灣遼左兵大集公以選接伴劉負外心
敬之明年天兵克平壤曰下兵嶺南先相公判
戶曹管饋餉其七月至咸昌病卒既卒喪之後
年以東宮衛率出木川縣監有上司因狠忤辱
之與隣郡太守李基高徐思遠皆棄官歸連為
大興積城當大亂之後推其常俸之餘以給親
戚之無依歸者事聞 上賢之特賜表裏以賞
之陞金浦縣令三年移龍岡三月解官歸父老
遮道願留戊申光海即位而自兵革來國無常
賦民不堪有大臣設宣惠法以公為郎明年因

為戶曹佐郎壬子出義興縣監時光海政亂及
菴挈家入原州不復求仕太夫人年高與其弟
勿深耕釣以養之四年太夫人歿既三年則
仁祖反正之元年也為戶曹正郎將大用朝廷
立大同法均行諸道公復為郎以便宜条列凡
十事欲上時大臣稱病公知事不行遂決意謝
而未去明年二月李适叛入京城公病篤舟行
至興原歿公善父母兄弟死而孤寡無依者視
之如親子嘗與人絕而終身不出其惡嘗為縣
邑以治理稱循法而便民不為姑息少利有古

良吏風生於我 宣祖即位之元年五月四日歿
於 仁祖反正之明年二月二十三日年五十
七淑人宋氏駙馬礪城君寅之曾孫僉知樞府
圻之女性不喜奢華一於順適以承公之志少
於公一歲八十三歿與合葬之墓在坡平西李
氏族葬生四女一男一男一女早死婿三人
仁祖功臣沈命世士人趙元老趙嶽沈命世趙
元老無子今皆有所後子曰果川縣監沈樞
獻陵叅奉趙演趙嶽有子男女七人男二人曰
趙以乾趙仁乾公無子今為後者其從子命著

命著有子男女四人男曰震徽銘曰
吾不知厚賦而薄試天之施耶

僉正李公墓碣銘

公諱慶恒字士常姓李氏其先本羽溪人始祖
球入元登制科仕高麗官至禮賓卿同正後世
有疑 太祖功臣事在國史五世有同敦寧之
芳將邊兵擊胡以功貴同敦寧生叅判光軾叅
判生大司憲戡大司憲生注書成憲注書生宣
務郎吉男宣務郎生公母鄭氏關西道都事或
之女 光廟相麟趾之四世孫也萬曆二十九

年正月十二日公生才聰明善記誦受學於疎
庵任學士叔英始知名十九選博士弟子二十
七以明經擢乙科及第補成均學諭明年陞典
籍方朋黨成風舉世爭趨而公好直諒不肯循
俗詭隨蹭蹬不為意歷司憲府監察刑曹工曹
佐郎正郎軍器寺司僕寺僉正宗廟署令補外
新溪縣令禮安結城縣監嶺南北關都事或曰
舉世爭名逐勢得之者皆是何不優遊取容斥
落若是公曰性不能亦不欲也壬午先夫人歿
公哀毀積疾明年癸未歿年四十三公仁孝篤

厚事父母必承意順適一以父母心為心每為
官遠途或不赴或赴而去歸未嘗久於官者皆
為親老故也有伯母臨年寡獨公事之如事母
其從兄已亡而有庶出女飢寒困苦者二人皆
資而嫁之凡親戚之貧無依者亦皆撫恤不怠
至性如此恭謹儉約居官二十年淡然如寒士
不喜玩好樂觀書無事手不釋卷以宣務公耄
年在堂公歿而恨不得終養至於垂絕猶屢言
不盡言皆此事也淑人李氏 太宗別子孝寧
大君補之七世孫也父湖西水軍節度使慶裕

大父溫陽郡守幹曾大父豐德郡守光胤母朴
氏秉節校尉文佐之女淑人善事舅姑姑鄭夫
人稱之曰吾婦至誠事我婉容二十年婢僕有
過從容責諭曰善楚非婦人事也有一婢為庶
出弟所私畜生子數人而貧不能贖即成券以
與之隣里有假貸資無吝色亦不責其償天性
仁厚類此淑人長於公一年六十七歿公初葬
於廣州治南台葢里先塋之次至是改葬同州
彥州里同敦寧墓左岡淑人祔于左有二男二
女男德雨嘉雨嘉雨有茂才不幸無命瑞雨文

科婿尹得說監司李瑞主進士其銘曰
恭謹者德之本儉約者福之門善積者行淳福
厚者理惇天道之報可必於後昆

記言別集卷之二十一

記言別集卷之二十一

丘墓文

贈吏曹叅判鄭公墓銘

公諱凝遠字士完觀水其別號也姓鄭氏系出
東萊東萊之鄭國之大姓國初有直提學賜直
提學之後有左叅贊蘭宗以文學貴叅贊生昌
原都護府使光輔府使生江西縣令漢龍縣令
生社稷署令純福署令生水庫別提象信於公
為皇考妣宗室李氏長男期遠丁酉之亂以明
將楊元儉相死節於南原褒 贈左贊成又追

爵三世縣令為左承旨署令為吏曹叅判別提
為領議政公兄弟五人公最少天姿俊秀嗜文
學學懷素書才藝夙成一六丁外艱其哀感哭
泣見之者皆以為善行三十成進士三十三歿
一時交遊士皆哭之如親戚出贈賻以成禮葬
坡州臨津下向陽公和而直介潔少許可所與
遊皆時之良善名譽日廣不幸早歿人莫不惜
其才而悼其無命娶咸興府判官洪堯佐女洪
氏亦至性善行事姑不失懽心公歿而既三年
猶服食無變於居喪之日五年而姑夫人歿三

年而洪氏歿洪氏先公一年生後公八年歿四
十一合葬向陽男之虎以直道顯行大司諫推
恩進爵公吏曹叅判洪氏為貞夫人二婿朴汝
城宋之和皆士人之虎生行一行百行萬又庶
出子行千行一縣監行百叅奉婿五人洪景墳
尹徵夏吳始鼎李保胤李浚徵夏縣監浚進士
朴汝城一子嶠宋之和二婿任塾金鉉洪景墳
一子錫九二婿柳緯相成萬齡尹徵夏二子普
會婿進士黃釗行一三子潤周演周一子幼女
三人婿趙宇鳴洪重績一女幼行百四了經周

言言別集卷之二十一
緯周二子幼婚俞世重二女幼李保胤二子徽
徵婚丁致重一女幼行萬四女婚一人盧世煥
女三人幼行千一女幼內外子孫三世五十人
其銘曰
所賦者厚而胡嗇之壽不發於其身以裕其後
人

戶曹判書金公墓表陰記

判戶曹金公世濂字道源本善山人高麗侍中
宣弓之後曾祖 贈左贊成弘遇祖 贈吏曹
叅判孝元父 贈吏曹判書克鍵母陽川許氏

弘文館典翰蔚之女公才藝早成致名譽二十
三選國子兩試二十四擢甲科第一人當光海
八年其明年在諫院方廢 母后議起公首論
其主張者得罪竄西塞之郭山一年移江陵又
一年得釋許任學居住五年 仁祖克大難以
修撰召之常侍經幄或在兩司卒貴用致位列
卿以御史廉問郡縣二湖西湖南嘗忤直諫貶
官一以執義斥玄風縣監使絕國一日本通信
副使親老乞養一以承旨出安邊任方面三黃
海咸鏡平安等道觀察使自公使日本還 上

多之特加通政為兵曹叅知叅議吏刑曹叅議副提學再為密直由關西省入為大司憲其年改都承旨擢拜戶曹判書明年卒年五十四公溫厚有雅量知遇仁祖甚倚任之每言治道以君德為先其在方伯郡縣以寬民正俗為重玄風鄉約條制上令頒行四方論事詳密如慰諭清地疏執義辭職啓事俱為救時之嘉猷為文章尤長於詩婉麗有法有東溟集公之墓在揚州治地姑毋峴西南之壠貞夫人柳氏籍文化 贈兵曹叅判成民之女公卒後三十六

年八十歿夫人德善嫻行宗族歸心其正家教家為女中君子云生三男二女男翊相弼相儁相翊相早歿其二婿李嘉雨申高前夫人亦文化柳氏無子其葬在州東三十里別非里平靈之洞

贈吏曹叅判李公墓碣銘

公諱禔字子瞻姓李氏系出延安高麗世有太子詹事襲洪是為始祖至本朝有戶部尚書元發生議政貴齡都觀察使貴山觀察使生都護府使續旣族大而貴 太宗欲以其子尚公主

而續不肯從命 太宗怒欲置法禁錮其子孫
至三世廼得解有叅議仁文始顯用又三世至
正言澍 宣祖傾心李珥舉國而聽之明黨大
起澍言珥用事太專斥出為嘉山以歿素以嚴
見憚竟不復用於朝後以長男光庭貴追爵領
議政有次男昌庭亦有重名於世 仁祖重興
之初擢拜咸鏡道觀察使卒觀察使六男公最
長毋星山李氏處士應明之女也公以名家子
性恬靜好書革戶蒯席飯糗茹草不以利達為
心既以才學發聞自廢主之世見世道大亂恥

之寧潔身自守後逢世故不樂因廢舉挈家至
上洛之松峙耕稼以自給自號稼隱亦曰治世
閑民鄉黨子弟受業者日集所居成黨塾其居
家之節兄弟六人不析產分居諸弟登顯仕者
每歸家必下馬於閭外集處一堂敬事如嚴父
子弟或有過不言終日反自責必改過請罪然
後廼許至今子孫勉飭謹受家教不為非義忠
愛不衰居父母之喪不脫經帶守塚三年居家
哭泣人之見之者皆以為孝子之高行其祭祀
之禮在子孫者器皿肴饌定有恒式皆可法也

趙公綱沈公大亨許以貞士而時來相款公樂
自隱無名不欲與顯者相交權來往真古之所
謂清士者也公娶永川李氏刑曹叅判民寘之
女有賢婦人之德閨門之內無一違君子之教
而養子孫亦未嘗以慈愛而壞禮式也生二男
二女男觀徵方為江都留守以廉謹聞其次鼎
徵早歿婚二人儒生尹爾久叅奉李雲根觀徵
生沃淳淑浹沃以副提學忤用事者斥守淮陽
淳淑進士婚閔昌道及第鼎徵生湜方為修撰
又有庶出子澤尹爾久二婚李玄綏韓宗揆李

雲根二男一女幼沃生四男長萬秀進士以觀
徵貴公追爵吏曹叅判公生於萬曆二十五年
丁酉歿於崇禎二十一年戊子年五十二李氏
與公同年生後公八年五十九歿合葬之墓在
臨瀉蘆原辰向之原其銘曰

自古清節之士不屈志特立果於忘世者皆是
而忠敬篤行蓋不多聞若公哲哀原憲能學道
躬行終身樂於草澤中孔子嘆之若子殆其庶
幾哉

金判官墓碣銘

公諱永者字子壽姓金氏光州人光州之金為
三韓大姓見於譜牒者二十六世至本朝我
康靖王時有正議政國光為名臣於公為六世
祖也曾祖諱鎧事我 昭敬王為右叅贊時李
珥方用書以直言忤於珥擯斥而卒祖諱世輝
廣興倉守父諱信早世母率州奇氏 贈領議
政應世之女而已卯名人典翰遵之曾孫也朋
萬曆十六年我 昭敬王二十一年五月十二
日公生豪邁有氣槩不問細節自少時交遊士
皆重之許院正厚李洪州命雄每論交許以奇

才者也自永昌死之後遂有廢 母妃之議始
起李文忠公元翼諫而得罪公同太學生負洪
茂績等上疏力爭者竄自此時事大變連
有大獄人人仄目而又有投書事將朝夕有變
首相奇公自獻覺之事雖沮反謀相國日密陰
求過以起大獄而欲以公媒孽其禍相國公之
母奇夫人之兄也公以計破之奇氏之禍得已
公三十始入仕明年 太妃閉之西宮而諫者
皆得罪奇相國亦有北塞之竄公以監察棄去
居原州五年為全州府判官時廢王之末大小

潰裂庶事散亂公悉蠲無名積弊禁私偽尤善於剖決邑稱治時有付處以下諸囚贖金之令判中樞金公辟謫居萬頃貧不能辦金公與其家素善出奴婢七口漢上二石田以奉給不以邑入相累也後年有反正之事大亂初定人心未孚時府尹鄭文孚有母之喪以喪歸而州有叛民欲乘時報仇者公聞之身遣之出湖西境仇不敢動奇相國既召還而功臣等積忌已久因大獄付處瑞山仍族其家公遂去歸吏曹責棄官迫遣之而臺諫論以官長有喪而縱叛民

作亂為所駁罷功臣元斗杓為監司以府庫財多無面啓前後官皆逮繫以及公其實為公也事下監司覈實則事皆無實而公猶徒配扶安二年國有亂得釋歸過連山號召使金長生留公為從事聞事定罷兵乃還丙子大亂後公已五十議政崔鳴吉聞其賢欲推薦之擢為大用李植不可不果薦公居寬川漁釣年六十七其三月二十九日歿墳墓在州南六十里華嶽洞淑人鄭氏合葬其墓銘曰
智周而行馴能與物屈伸先事遠害無灾無愆

明乎處患亂之權

淑人河東太姓高嶺鎮僉節制使復禮之女而故承政院承旨熙績之孫慈仁謹飭家道敦睦待妾媵有恩一門稱其賢先公八年五十七歿公死之後七年奇夫人八十七歿有二男二女男翬翼婿二人僉正蔡翊俊承旨鄭繼胄又庶出子四人翩翩翎翔女一人婿朴后清翬生尚堅碩堅又五女婿叅奉鄭擅儒生柳祭李景益沈枋女一人未嫁翼生庭堅二子塲而死三女婿白時采盧瑞胄女一人未嫁蔡翊俊四男四

女男聖瑞文瑞元瑞疇瑞婿四人直長鄭鏘儒生洪受箕韓瑞已尹光績鄭繼胄無子有所後子世會翹二子允堅重堅女二人一為叅議李袖妾一適柳學周翹二婿元萬長李時昌一子幼内外子孫七十餘而幼而未長者不記

再思堂墓碣

公諱龜字浪翁姓李氏本鷄林人高麗相齊賢七世孫也世有達官貴人號為大族大王父叅判繼蕃王父觀察使尹仁父縣令公麟魯陵六臣故集賢學士朴彭年之婿也連六臣事不顯

用於世也公以名臣之世好卓犖潔身高行少
遊佔畢齋之門亦嗜學非聖人之書不讀偉然
有大節秋江處士南孝溫稱之曰可以託六尺
之孤者也早年陞上庠 成宗二十年及第由
承文正字至博士兼太常以譴罷放迹名山水
遊楓嶽有摩阿僧見公問之曰目覩萬物乎萬
物入目乎公曰目覩萬物萬物亦入目作格物
物格說後叙為禮曹佐郎及戊午史禍起公佔
畢門人目為黨人流郭山三年量移羅州甲子
加罪諸黨人公當論死有僕隸悶其無罪死私

謂公曰罪非罪君不君盍亦善為之亦引李長
坤事言之公愀然久之曰君命不可亡也臨刑
亦自若廢王聞之愈怒以為死且不服命沒其
家父子兄弟皆連坐二弟鼉鼈因逃世不出也
中宗元年大釋黨人皆復其官追爵承政院都
承旨 命錄用其子孫夫人崔氏 贈叅判鐵
孫之女稱賢婦人之行公被禍當甲子十月二
十四日夫人薨八月十七日歿合葬揚州治東
泉溪崔氏族葬當禍夫人弟承文院正字命昌
卽去官至羅州以喪返而葬公有男四人曰洙

曰江曰河曰渤洙為郡守渤 贈右通禮洙孫
弘業以科目進將顯矣不幸窮抑而歿渤孫時
發刑曹判書時發二子慶徽吏曹判書慶億為
左議政弘業孫彥茂以善行聞 孝宗時表善
行間者也仕為松羅察訪方八十餘公別號曰
再思堂為文章亦一時所推許今其文不大傳
東文選大東詩林有詩賦累十篇遊金剛錄一
卷傳於子孫其銘曰
君子道窮逢時不祥身罹禍殃憐人媒孽搆此
觥觥良善斬伐守正安命死生一節忠臣之烈

百代之名志士之欵墟墓之哀

公子湖安君墓碣銘

公子諱澳字伯瞻我 中宗四世孫而德興大
院君諱昭之曾孫河原君諱鉉之孫寧堤君諱
錫齡之長男也寧堤君為後於仲父河陵君諱
鱗河陵君為後於諸王子錦原君諱嶸於 宣
廟實親兄弟之孫也母唐津郡夫人韓氏大司
憲淑之孫也明 顯皇帝萬曆二十四年二月
二十日公子生生而秀羨 宣廟號曰奇兒而
寵賜之特厚十五初授三品爵為湖安正尋增

秩為都正後襲封二品君公子愛人好士不為
侈服奢縱當光海世閉 母妃於西宮用事者
言 母妃當廢議於羣臣公子曰不可卒得罪
甲子之變又被誣逮繫大丘力伸之赦處興海
尋得釋丁卯有狄亂 仁廟出狩公子持母憂
以墨衰從 上於江都後有大獄被連坐流康
津康津南海上窮處嘿嘿受屈常讀書絕不應
接為人事人或邀相叙暢必辭以罪謫故相李
敬輿嘗廉察湖南巡行海上為留叙累日握手
歎曰賢哉居謫良苦 上知公子無罪特赦還

復爵位如舊公子感激常涕泣言之優遊自適
不預世事以杯酒自娛及 上登遐持喪不食
旨曰無以報 上恩今 上六年三月十九日
公子卒年七十公子好寬大不拘細故篤於宗
族忠於交友至於僕隸下賤亦遇之不失恩信
教家以滿溢為戒臨事以推恕為先喜遊樂聲
色必謹有寡妹一女孤貧無所歸必資而嫁之
莫不曰公子之賢也及公子之喪也客無不哭
失聲相吊云夫人金氏籍善山判兵曹履元之
女有古賢婦人之德治家不言而教行庭無間

言五十年公子常稱之曰吾於宗族交友各得其歡心皆夫人之賢也夫人與公子同年生先公子五年歿為六十五生於丙申三月廿七日歿於庚子四月十七日合葬於揚州治南十五里孝子峯東南之麓有四男四女男斗漢奎漢井漢軫漢皆士人婿四人士人柳顯立府使崔寬士人孟胤瑞申應澄側室男房漢又女二人

銘曰

親仁慕義貴而能恭啣杯自娛循俗有容一心皎皎可質蒼穹忠信之報吉人有終孝子之阿崇四尺之封刻之山石以表幽宮

徵士綾城具器之墓表銘

昔從兄觀雪公稱之曰高山具器之為當世隱君子云今從兄已亡具氏有子孫以其先人行記乞銘於穆讀其書其潔身修行真隱君子者也公蓋仁祖世徵士諱致用器之其字也其先本綾城人大父大倫追爵承政院左承旨父煒進士母豐壤趙氏公聰明過人弱齡不識字聞人讀書輒成誦開卷試教一過貫誦無碍莫不曰奇才稍長既博通經史雖老師宿儒亦莫

及也樂讀聖人賢人書專心經術二十九成進士癸亥 國家中興設科選士公因一應舉耻之終身不出見姜鶴年子久論學大悅遂相與為師友子久書贈並世相感四大字相推許云仁祖二十三年有薦之者召拜齋郎不就公天稟峻潔居處必嚴辭氣必溫教家有禮至於童幼事長亦無不肅然有序卜居高山邑治之東名其室曰于郊堂安樂其中與物相裕以壽終公博於百家書其學篤於彞倫人事之則而樂間暇巖泉於世刊泊如也先娶光州金氏生庠

庠庠後娶求禮張氏生廓庠生鼎來鼎新鼎徽鼎位鼎五鼎鎮庠生鼎鉉廓生鼎起鼎九庠膺無子庠以庠之子鼎新為後公生於皇明顯皇帝萬曆十八年八月廿六日歿於 上之七年六月十六日年七十七同年九月廿九日葬于同縣觀音洞先兆之次西向之壠孺人金氏祔葬公有所著朱子大全語類通編心經諸書註解公既博於經術為裨益於斯學者至如此又有閑中遣興作詩什七百篇嗟乎懷獨行君子之節隱而不售世莫有知者銘曰

守道者固窮而不改知命者不見知而不悔吾
於斯人者見其守而知其介舉其邇而信其大

鄭掌令墓銘

公諱百亨字德後姓鄭氏本晉陽人有 莊憲
名臣鄭陟者以文學起家至脩文殿太學士錄
清白吏卒謚恭戴學士生承旨誠謹好直諫廢
主惡而殺之男舟臣承文院博士痛父非命不
食哭以至滅性於公為三世祖 恭僖時嘗表
忠臣閭祖諱元麟初筮仕為陵署郎亦以至行
表孝子閭者也父諱孝成 昭敬時以清士著

名亦有善行旋門至 憲文時擢拜湖西道觀
察使卒 贈左贊成娶南陽洪氏信川郡守義
弼之女生二男長百昌博學善記誦為文章早
得名譽官至京畿觀察使公為次子而少有志
行好卓犖絕不蹂趨俗人蹊逕為舉子業亦不
以瑣屑為工二十八選博士弟子國家中興之
年以才選為連源道察訪其明年擢增廣及第
後三年以承文著作選藝文檢閱陞奉教丁卯
之亂 上出幸江都事平賞從 上勞陞司憲
府監察累轉司諫院正言司憲府持平求補外

為通津縣監以公廉稱後為侍講院弼善改司
憲府掌令時有 章廟追尊之議公執不可忤
上旨不復顯用居散班三年丙子奴來侵三日
先驅已薄國都都城擾亂 宗廟百官諸妃嬪
皆入江都 車駕出奴騎急道不通 上即馳
入南漢受圍四十餘日正月奴陷江都諸主兵
者皆走右相金尚容自燒殺諸妃嬪姬妾婦女
百官皆被驅先觀察公老病不能動公以為父
子皆陷無一二全理寧不辱父子訣衣朝衣望
行在所四拜而遂自經死 一城既陷闔族皆死

公有兄子善興收殮以及葬廣州治西鄭氏族
葬奴既約成而去 上命祠部賜祭表忠臣閣
顯宗十年宰相白 上進爵承政院都承旨公
自其高曾以下及公之身皆以忠臣孝子旌閭
者五世公平生好直道一以高節自力能不墜
先人之訓死之時年四十八淑夫人慶州李氏
贈議政時發之女後公三十二年七十四歿公
無子有一婿權儒儒生愈憲愨愨早歿愈方為
某官以文詞顯憲以次子實主其外家祀事云
嗚呼鄭氏六世清白吏孝子善行四世忠臣之

烈二世逝而驚一世遠而教百世

進士楊君墓銘

君諱胆字以貞姓楊氏其先密城人高麗侍中起之後也高祖洙曾祖建成皆成均上舍祖孝立父許國皆以特行稱母陝川李氏 獻陵叅奉光祿之女弘文館校理迪之曾孫也君倜儻慕高行夙成自為兒時已如成人又能讀書力學二十一成進士當光海之末閉 大妃於西宮用事者日令館諸生亦上䟽言當廢謂之大論云君耻之不應榜而歸時江右士論務大言

禮法以為利階得官者皆是君笑之曰寧服優之服誦優之言以資衣食無媿也癸亥光海廢以先君之命入太學太學諸生多慕與之交者方國家中興選用才學士天官為之注擬者數而不及一命命也君平生好直義勇往不肯下氣與人苟合以此不悅者多而亦以此見重君有母之喪食粥居廬不脫經帶三年哭之幾滅性喪服父在為母期君子行禮猶恐其不盡於禮也不降非禮也君子以為孝子之過也丙子之亂南漢受圍急君起義兵馳赴亂聞 乘輿

下城亡草澤終身不出君五十四歿疾病屏婦
女毋得居前男道南請聞終身行之者君已不
能言書十六字與之亦書不成其可識者守死
善道四字而已遂絕庚寅十一月十八日明年
正月葬靈山縣西狸谷之原有所著漁村遺卷
傳於家妻善山金氏司宰監副正在銘之女也
生一男一女男道南婿朴最皆士人孫四人命
溥命漸命濬命游外孫三人朴明翰明會明德
其銘曰
仲尼有言不曰白乎涅而不緇不曰堅乎磨而

不磷不緇不磷以遺其後人

郡守權公墓銘

公諱東輔字震卿福州權太師之後而本朝有
檢校漢城尹鞠六世而至右贊成忠定公機事
在太史於公為皇考妣貞敬夫人崔氏系出和
順贊成文惠公善門之曾孫典翰漢公之孫明
武宗正德十三年我 恭僖王十二年公生弱冠
以鄉試壯元始著名以門蔭除 獻陵參奉二
十六選司馬試時忠定公竄寧塞一年歿公三
十一既除喪因不出二十年至我 昭敬王立

忠定公特復其官公乃復仕官至郡守終不樂
謝歸田園從山水之樂築室溪上曰石泉精舍
山中又有居然軒皆泉石處好音樂平居絲竹
不撤吟哦自娛七十五歿葬卧丹權氏族葬也
公無子取其弟縣監東羨子來為後仕為監正
生三男尚忠世忠碩忠內外子孫四世五世計
至五百餘而大嶺之南大族九家可謂賢者之
世樹德之報也今千里問銘者公四世孫國子
進士斗寅問其世尚忠生陵署郎霖斗寅其長
子云銘曰

謝仕歸田閑暇丘原以永其令名吉人之貞

晚覺李先生墓誌

李先生諱挺豪字英彥高麗門下侍中穡之六
世孫也高祖季町司憲府執義曾祖均弘文館
副提學祖善福早世父習忠武衛副司果母永
嘉權氏宣務郎夢翼之女也萬曆六年八月癸
卯先生生十五從守庵朴枝華先生受業焉二
十八陞上庠庠舍莫知也惟同年生負崔鳴吉
心敬之明年二月母權夫人歿後四年司果公
歿父母皆年老久病積歲月不能起先生食不

言言集卷之二十一
廿味衣不解帶者十年及其居喪之節居處哭泣君子以為至行四十從德信公子講大學經傳又得聞易乾坤文言之旨時光海無道日誅殺諸公子閉太妃於西宮諫者皆逐之先生歎曰人之道滅矣大亂不久歸長湍積雲以避世天啓六年先王克大亂之四年召用才學先生初授童蒙教官一年國有亂去崇禎二年復為教官教弟子以曲禮少儀弟子職為率以事親從兄為為學之本時雪公廬塚三年而歸於是有祥而返魂變禮答問其禮前日用酒脯

哭辭墓至家入門而哭丈夫婦人序立一獻而撤遂入主於廟有未嘗吊而來吊者拜稽顙哭如初五年遷通禮院引儀尋改工曹佐郎六年夏為黃澗縣監其冬罷歸韓山山井里三年有南漢之事先先生嘗自號曰師心至此易之曰晚覺不復以仕進為心居山井七年而先生歿十二年十二月十六日為六十二有姊子閔吏曹應協以東宮弼善還自潘中至韓城以喪歸葬積雲先生篤信好古弊衣惡食人不堪其憂先生常有權顏平生非忠信不言非篤敬不行其

行事不出於彛倫日用之則而樂謙順遜約常
若不足自飭惟嚴與物常裕人無怨惡而好善
無窮焉其見於聲音顏色者和而能嚴潔而不
隘使人望之可愛而可敬者粹然為成德君子
也宜人申氏族氏出自平山進士弘濟之女也
有一男曰大喜側室有二男一女男益喜長喜
益喜早歿女嫁劉世雄大喜生一男二女男曰
碩二婿李晉元李奮又有庶出子碌碌碑銘曰
不高不奇君子之平也不伐不爭君子之成也
禮恭德全君子之醇也多聞折衷君子之文也

貞敬夫人沈氏墓誌

貞敬夫人沈氏黃海道觀察使吳公端夫人也
沈氏自國初青城伯德符始貴大至懿憲公九
世公相三人學士二人方伯二人上卿一人門
戶之盛號為甲族王父諱友勝京畿觀察使以
宣祖功臣追爵領議政封青溪府院君父諱諮
吏曹判書襲封青松君謚懿憲母永嘉權氏兵
曹判書徵之女也夫人有孝友至性仁愛篤厚
十六歸吳氏吳公吏曹參判百齡之仲子也夫
人事舅姑甚孝克謹婦道恭敬不怠參判公甚

重之不以女子視之每有大事則必諮之稱善
不已吳公既以名家子好讀書所與遊多一時
才學夫人日供具不乏一不以宴色見公也光
海時夫人家連大獄懿憲公竄絕域十年家事
無大小專屬於夫人夫人能經紀不墜後懿憲
公復貴用位列上卿吳公貴為觀察使一女為
王子夫人長男登第為朝右人家既盛大而夫
人愈謙約抑損常以溢尤為戒及觀察公卒夫
人四十九溢米不入口身不脫衰麻號哭不絕
聲三年一門皆嘆息曰善哉乎悲哀自苦至此

而不絕者天也夫人曰險釁一息尚存未亡思
所以竭力者在祀具祭器修祀事每朔月時享
必躬執供具齋沐薦羞終身不廢居常坐不離
席不粒食至八十年後子孫益大長男官至刑
戶二曹判書次男父子為觀察使又其次由畿
省入為刑曹判書少男選翰苑連在臺省外孫
諸王孫貴人又四人夫人以孀居絕不以榮貴
為心常訓子孫必隨事篤勉亦曰其人至行
已立身邪正得失之辨尤明白謹嚴少男挺昌
常侍左右戒之曰吾老亡無日不願汝從仕也

朝夕無違我讀書自飭善也夫人見世道大壞
勉以謹守者如此夫人恬淨自正壽益高德益
邵明哲之知教訓之正非特至善之行而已亦
可謂女中君子云懿憲公八十四權夫人八十
六夫人必買屋就近奉養如在室時有夫人妹
早寡衰老居嶺南歿生而溫飽之戀歿而送死
之備一如同宮亦以遠故愈悲憐既篤於親親
仁及疏遠九族歸心至僕隸下賤亦必恩信周
洽令皆思盡心此皆德善可教於後代者也夫
人生於萬曆二十年五月十二日歿於 上之

十三年七月十二日壽八十一觀察公卒三丁
三年夫人卒其八月十八日祔葬滿月生五男
四女長男挺一戶曹判書次挺垣黃海道觀察
使次挺緯刑曹判書次挺璧早歿次挺昌司憲
府持平婿四人縣令李象鼎王子麟平大君湑
進士李粹蕃主簿柳以泰挺一七男始泰司評
始益縣監始鼎早歿始謙監役始震進士始恒
始萬始萬進士二婿士人鄭宗祥進士姜碩臣
又有庶出子始有挺垣四男始壽平安道觀察
使始大副率始亨始績四婿都事閔弘道士人

韓器明金鳳至黃鍾亮挺緯以兄子始萬為後
有三女皆幼挺昌二男三女長男始元其下皆
幼李象鼎四男允協允迪允濟允諧允諧進士
大君四男福寧君栢福昌君楨福善君柎福平
君楹二婿士人趙祺壽鄭重萬李粹蕃二婿士
人韓宗老金文夏銘曰
至行之積可以厚人倫可以觀禮義可以教後
世天之德善之報宜其彌邵而彌大

泛齋沈公墓碣銘

公諱大孚字信叔姓沈氏其先自青城伯德符

始大青城伯生安孝公溫我世宗昭憲王后
之父也於公為六世祖五世有京畿觀察使岱
事宣祖壬辰之亂從上西狩受畿省之命
伐賊兵敗死之上褒其忠列之元功追爵領
議政封青原府院君夫人崔氏右尹弘幹之女
也觀察公死之時公生七年其持喪感容見之
者多流涕及稍長崔夫人戒之曰寡婦之子俗
羞與之友如耻之莫如讀書修行公愀然色感
刻意力學非聖人之書不讀南遊見鄭寒岡先
生受心經鄭文肅公見公賢才遺周禮一部曰

周道在此勉之光海五年公二十八選一等進士崔夫人已老公事其兄恭敬不怠喜之亦惟喜憂之亦惟憂常有懼之顏也仁祖反正之年三月以善行初授司圃別提不就其六月其兄以不善父母流北邊身被拷榜生蛆公吮之徒步重繭勤於道路二千餘里人愈益賢之明年為重林驛察訪一年崔夫人歿食粥居廬三年庚午為大君師傅孝宗潛邸時也私餉師傅公辭以哺餒由是禮遇益厚壬申累轉刑曹佐郎癸酉擢乙科及第以禮曹佐郎遷諫院為

正言王子仁城君珙既賜死死而其三子流海島上特寬釋之兩司爭論不已公曰此殿下盛德事也既不能開導於前又不能將順於後非所以報殿下者也論者目之以黨逆斥出為保寧縣監辭不赴甲戌為松禾縣監明將毛文龍鎮檄島其吏卒行郡邑恣所為民不堪公嚴條約禁橫暴聚鄉縣子弟教以禮俗西路專務征利與管餉不相能謝去卒就理徒配報恩數月國有慶赦還丁丑卜居聞慶之嘉隱名其室曰泛齋謂無家也連為修撰校理皆不就

戊寅以持平召之公以大亂之後邦政大壞遂
罪狀債事諸臣其大臣首罪者有連宮禁族不
而盛所言切直 上不納卽告歸尋改成均直
講不就其年三南大飢大臣白 上選擇三南
都事兼管賑恤事公以薦為慶尚都事秋仍覆
審災傷以量田田政未備條上便宜均稅事累
百言 上從之庚辰以修撰再為獻納以王子
水閣事上疏曰苑樹者先王之所種植一朝伐
之作王子水閣此 殿下慈子而不敬先王也
上怒適獻納公連在三司吏曹癸未以宗簿正

出為星山縣監標榜城門曰持身清謹聽政公
平太守事也太守勉之敦孝友聽約束無廢法
令百姓事也百姓勉之存孤弱問高年每以歲
時饋米肉一如古事己丑復為應教兼侍講弼
善世子以舊時師傅欲尊禮異等掌禮者以為
不可然每入侍世子必敬禮下之五月 上登
遐擬 大行廟號公上劄曰今 大行大王廟
號有以祖易宗 宣祖有光國大功而廷臣欲
稱祖尹根壽以為無義而止之後許筠李爾瞻
作偽書更為稱祖之說當時無文獻老成為國

盡言如尹根壽者其事遂行繼體之君雖有功
有德為百世不遷之廟而為宗而不為祖周武
王為周世室漢之文帝唐之太宗玄宗晉之元
帝宋之高宗皆不得稱祖功以祖德以宗者俱
為不遷之廟非宗貶於祖祖加於宗也太宗世
宗高宗中宗皆稱宗而不遷則固自若也踵無
義無禮之禮上祖號於先王不但事非經據
違禮大矣上怒言卒不見用後以舍人復為
司諫因事引避舉金尚憲言之政院以為國之
元老不可名也上命貴問公曰禮君前臣名

名尚憲以此也遂罷司諫後年上追罪議謚
事以為誹謗先王公付處淮陽用諫者言尋
赦之內申遷先公之墓公曰禮三年服者改葬
總是三月之喪也其居處哭泣飲食一如初喪
廬墓下三月時公七十一因羸敗積疾其後年
十月廿八日公歿葬處仁先墓之傍已向原公
少遊君子之門聞古人之學其居家事親處昆
弟皆可為德善之表與人忠愛篤厚見善則勸
知過則規自守甚嚴一不枉已而循人好讀書
重經學常言曰天地事物之故無窮在吾心廣

大高明不學不得明於大義察於制度通古今
之宜然後天下事可言公嚴正有儀辭受有禮
進退有義臨事有法其所與之者龍洲公坡山
李觀察吾亡從兄雪翁此數子之賢皆以直道
交相善并列之公初娶西河任氏觀察使鼎臣
之孫無子後娶光州盧氏領議政守慎之曾孫
生一男一女男昌徵少有至性善行不幸早歿
婿都事權尚規又有支庶子昌閏女四人一人
李震謙妻而三人郡守鄭何察訪南斗徵牧使
李慣妾也昌徵生羲圖又早歿有二子皆幼銘

曰
德之辨存乎灾疾德之進觀於忠信嗚呼確而
貞敦且順

許同樞墓陰記 乙巳

公諱靖字卓甫姓許氏本陽川縣人大父芑
贈戶曹叅判父容 贈兵曹叅判母豐壤趙氏
我 太祖功臣趙巖之後也公善騎射 宣祖
三十九年增廣及第為宣傳官後八年陞折衝
將軍三年為加乙坡鎮僉節制使以能陞助防
將留咸興一年祖母歿以喪歸壬戌為衛將改

僉知中樞 仁祖元年為結城兵馬都尉丁卯
之亂從 上於江都由衛將出為釜山鎮僉節
制使甲戌為仁同都護府使丙子為內乘兼宣
傳官冬有狄亂明年春 車駕至自南漢賞
扈從文武百官公例陞同中樞後連為樂安長
興卒已趙夫人歿既三年仍不復仕嘆曰老母
已歿復為誰求養老於田廬足矣謹祭祀睦宗
族以率子弟無事樂觀書每得古人格言必書
諸壁以觀省焉壬辰以八十加資憲壬寅以九
十加正憲其明年正月十七日歿公平生好恬

湛六為鎮守未嘗營立產業貞夫人蔡氏籍仁
川樞密院使實文之後也先公二十三年歿墳
墓在廣州蘇山與公同塋而葬西向為封有三
男一女男塋塋塋塋生負李敏及側室子女四
人男壇垓壇選武科婿權管安鎬內外子孫四
十人

李蔚珍墓誌 戊申

公諱之英字子實姓李氏本全義縣人其始祖
高麗太師棹太師子孫世有顯人七世至門下
平章事什其世益大後三世皆至大官選部典

書子華叅贊議政府事立直知中樞院事貞幹
謚孝靖孝靖公以孝特聞大夫人百有二歲孝
靖公七十餘稱壽母壽子我 世宗時推 恩
壽母宣德九年四月 王旨賜金氏為貞大夫
人夫人自言老人平生未嘗向日月便旋人謂
之敬天之壽貞太夫人六世至禮山縣監佖始
居江左之河濱於公為三世祖大父慶斗追爵
兵曹叅判父宗文軍威縣監母慶山金氏司憲
府持平慶昌之女而高麗修文太學士伯英之
後也公早有才名二十九登丙科及第補成均

學諭至學正為北道兵馬評事卽謝歸後以成
均典籍遷禮曹佐郎還館職為直講以聖節賀
使書狀官如京師後轉累官擬於臺府當光海
之末朝政極亂公棄歸河濱有江上之樂優遊
忘世者五年癸亥 仁祖克大難召用才望公
為北青節度判官有治績 上賜表裏五年以
親老歸後為戶曹佐郎不就而母夫人歿既除
喪為蔚珍縣令為政不苟科條詳密民德之以
治理聞將有賞國有亂不果尋以縣令兼春秋
館記注官明年罷其年先府君歿既葬廬於墓

下因積疾哀毀卒至於不勝喪亦命也年五十
五葬河濱公事親孝處兄弟友善於秉職臨民
取科第三十年官不過令長公平生避名勢不
喜苟官見不可則去不以拓落為耻公以此名
不揚而行益全公娶司贍寺叅奉金致三女生
瑒瑜球瑜進士球 孝宗四年及第嘗以順天
都護府使方為泰安郡守女三人其婿進士鄭
昌基叅奉李志遜士人李敏卿庶出子四人珉
璵璞琨又女二人銘曰
攫拏者危自守者全嗚呼寡廉恣欲瞻智連蹇

子都之醜嫫母之始

鄭處一 表

鄭道洞子重自吾東海歸始末相見君樸實嗜
古少言語敦慤忠實吾見而悅之聽其言觀其
行古人所謂先行其言而後從之者吾於此人
者見之矣君少孤善事母耕田力作以奉懼心
日讀古人書究古人之學亦益我者也吾心賢
之君本朝貞肅公洲之後而直學士淮之六世
孫也其家有世故父某連坐流日南以為後於
族父縣令濂有庶母某上言守闕哭乞免連坐

得釋君十四父歿而繼而其庶母某死君為之心喪三年母宗室李氏賢有婦人之德年高教子孫善行皆可法母歿君已五十餘衣衰麻居喪哭皆如古人者纔免喪君死君死之前月又有少愛子死君五十六聞吾辭右相歸田里來見我還去數日君死此死訣也君前娶盈德鄭氏有子婿一人儒生李鼎紀後娶龍駒李氏生二男長曰澤才十六其次君死之前月無命短折者也嗚呼君耆艾之年持喪過節除喪數月而君死此不勝喪而死也嗚呼良善無祿至此

也良善無祿至此也

知中樞李公碣銘

公諱久澄字澄源別號栢村姓李氏本全州人開國元功完城君伯由之七世孫也曾祖諱穆永安道兵馬評事當燕山戊午史禍以佔畢門人被禍死及燕山廢事得解復其官後以恩例追爵吏曹叅判祖諱世璋江原道觀察使明宗世選清白吏者也父諱鐵承政院左承旨贈吏曹判書母泗川睦氏社稷署令諶之女也隆慶二年我 昭敬元年戊辰公生萬曆十九

年辛卯補成均進士二十五年丁酉登別試及第初授成均學諭三年遷藝文檢閱侍講院說書至甲寅十五六年間頗顯用為刑禮戶曹佐郎司諫院正言獻納司憲府持平掌令館職典籍直講侍講院文學弼善工戶禮曹正郎玉堂修撰副校理宗簿寺軍資監正補外安山郡守咸鏡道都事光海時用事者累起大獄宗室大臣多僇死李相國恒福亦以護送得罪公為掌令以爭論罷四年不復用斥為文川郡守仁祖元年召拜內資寺正明年李适叛犯京師

上出幸公州及事亟公以從上勞陞通政常論事公言故相澈奸邪小人忤時議不復用於朝連出外為高城善山青松亦不得久於官或一年或二年丙子之亂又從上於南漢上既還都公以刑曹叅議陞同中樞兼副揔管尋改工曹叅判仁祖二十五年以壽考陞資憲入耆老所其明年有戊子重牢慶壽詩卷其十月拜知中樞卒壽八十一十二月葬通津縣霜浦族山性仁孝父母之喪食粥居廬躬執祭物一如生養以終三年恪守家法尚儉素不喜交遊

謹厚不以喜怒示人書傳家占事以自警言曰有
遠此戒者不得入先人之廟有娣發孀無所歸
奉養於家以事母者事之恬靜好書有所著綱
目註說家禮疏義東國編類以耆老歷事三朝
無一推勘過責臨事審慎事過人無言是非者
貞夫人柳氏籍晉州宗簿寺正之女母和順
崔氏夫人少於公一年公既卒之六年八十六
卒祔葬同原男擲豐德府使擲生斗元其官婿
柳之芳其官又庶出子二人斗與斗信斗元生
時鼎時復時升時謙時復進士婿二人吳尚文

鄭志寧尚文進士其墓銘曰
和而廉確而謙恪慎守正貴而能貧眉壽好德
胡考之仁警戒先訓以篤古人

趙君士晉墓銘

趙君諱維少字德積本漢陽人 太宗相良敬
公消之七世孫也曾大父諱壽崑折衝將軍
贈吏曹參判大父諱珙工曹佐郎 贈吏曹判
書父諱翼男司贍寺奉事 贈左贊成贊成公
二男長男綱以文學貴至判中樞君後夫人宋
氏出也宋夫人左承旨賀之孫司贍寺奉事應

一之女也萬曆四十一年四月贊成公歿其十
一月某日君生君於贊成公為遺腹子也贊成
公以善行聞君聰明孝善生八年病痘能悶親
之憂不以呻痛聞於側既成童受學於師心李
英彥先生先生教弟子必先以儀弟子職君且
夙成其居處揖遜進退之節尤可觀名譽始著
十七而冠鄭文簡公蘊為賓字之曰士晉判中
樞常稱之曰吾官京出宰吾弟常侍親之側凡
供養澁滫藥物烹煎皆出弟手其心以為事親
不可以使人亦其誠愛過人者然也又其奉養

之暇居常食食起居問文字靡晝夜不欲須臾
離我至於聲色貨利持戒截然善與人謙遜篤
厚人皆曰善士善士為詩頗脫塵白又善楷書
二十三得血疾因日憔悴國有大亂奉母夫人
奔竄嶺海千餘里判中樞以司諫乞養為興海
一年謝歸寓居新平之年疾復發為尋醫入京
至果川疾卒劇吐血咳咯遂絕我 仁祖十八
年六月三日年二十八判中樞哭之傷心曰天
道無親常與善人者徒虛語耳善孰如吾弟而
學不充其志親老不克終養而歿嗟乎命物者

之好惡其與人異若是舛耶其七月返葬抱川
先塋之右其向之原妻慶州李氏故承旨廷讎
之孫僉知中樞灝之女生二男著龜威明著龜
君死之年不幸短折成明以才藝發聞擢大科
方為其官銘曰

詩禮之門學士之弟有家有訓惟孝惟悌叔考
季考多爾學藝秀而無命天之將厚報爾後世

處士鄭君墓碣文

君諱希聖字有立姓鄭氏其先大寧人前世有
左相乙卿典書崗連世貴顯四世至檢閱僉無

子其弟生負侁有二子曰承先承尹以承尹為
後承尹仕為尚衣直長承先又絕歸其少子汝
忠以祭其祖澄 昭敬時為牛峯縣令於君為
皇祖考皇考諱文亨宣務郎妣慶州鄭氏朔寧
郡守明善之女萬曆十七年八月二十七日君
生君與吾皆慈山弟子相知最深君樸直有古
氣嗜善若不及嫉惡若浼已行已必正方一有
悔吝不能安寢食於今之世不得復見於人人
也當光海政亂用事者多招佞已立朋黨有徐
國禎者尋前世之舊私相好甚厚欲誘致之君

耻之絕不見後其諸客欺多士名以為公言上
書爭言廢母妃事而亦嘗竊君之名而君不知
癸亥敗後其事乃出有韓公汝謨李公基祚金
公南重大驚曰此衆人皆知之使此人蒙惡名
吾輩與有責焉力伸之後有親舊顯者知君之
行誼將欲推挽君歿我 仁祖十六年四月朔
日年六十君落落不肯與顯者從遊窮居而自
得日勤古書必窮旨趣正音讀精訓詁以授子
弟常以修身謹言為戒勉勵樸實不喜過情之
譽常言曰苟學如古人窮不恨也此皆古人之

心吾甚善之嗟乎吾知君仁足以感人忠足以
動人介足以警人吾聞有德者必受其報君雖
窮其待子孫必顯可知君娶故軍資奉事李浩
然女生五男曰東益曰東稷曰東高皆國子上
舍曰東奭曰東龍皆秀而文不幸東奭早歿東
益一女嫁而東稷一子新娶為成人曰光圖其
弟光疇夙成可愛

宗室錦平君墓表

公諱義壽字宜叟我 惠莊大王四世孫也曾
祖德源君曙祖蓮城君漸父仁江君樑母竹山

記言別集卷之二十一終

記言別集卷之二十一

